

Na osnovu čl. 11. i 12. Zakona o udruženjima i fondacijama Bosne i Hercegovine ("Službeni glasnik BiH", broj 94/16), Skupština Saveza lovačkih organizacija u Bosni i Hercegovini, na sjednici održanoj 27.04.2024. godine u Zenici, usvojila je

## STATUT

### Saveza lovačkih organizacija u Bosni i Hercegovini

#### 1. OPĆE ODREDBE

##### Član 1.

Savez lovačkih organizacija u Bosni i Hercegovini (u daljem tekstu: Savez) je Savez koji je registrovan kod Ministarstva pravde Bosne i Hercegovine, u skladu sa Zakonom o udruženjima i fondacijama Bosne i Hercegovine (u daljem tekstu: Zakon).

##### Član 2.

Savez je samostalan u ostvarivanju svojih ciljeva i djelatnosti utvrđenih ovim Statutom, a djeluje u skladu s Ustavom BiH, zakonskim propisima, međunarodnim konvencijama kojima je pristupila BiH, deklaracijama Međunarodnog vijeća za lov i zaštitu divljači (CIC), deklaracijama Europske lovačke asocijacije FACE i drugim deklaracijama i aktima koje sam donosi ili prihvati.  
Savez djeluje na cijelom području Bosne i Hercegovine.

##### Član 3.

Savez je neprofitabilna, nevladina, nezavisna, dobrovoljna i nestranačka organizacija osnovana radi ostvarivanja svojih ciljeva i djelatnosti Saveza u skladu sa Zakonom o udruženjima i fondacijama BiH.

##### Član 4.

Ovim Statutom, u skladu sa članom 12. Zakona, utvrđuje se:

- naziv Saveza, skraćeni naziv, i adresa Saveza;
- ciljevi i djelatnosti Saveza;
- postupak za primanje i isključivanje članica Saveza;
- organe Saveza, način na koji se biraju, ovlaštenja koja imaju, kvorum i pravila glasanja, trajanje mandata, osobu ovlaštenu da sazove skupštinu, uslove i način raspuštanja, odnosno prestanak rada;
- pravila za ostvarivanje, upotrebu i raspolaganje sredstvima Saveza, kao i tijelo koje je ovlašteno za nadzor nad upotrebom tih sredstava;
- ) način podnošenja finansijskog izvještaja i izvještaja o radu;
- otvorenost rada;
- g) postupak za izmjenu i dopunu statuta, ovlaštenje i način donošenja drugih općih akata;
- h) opis oblika i sadržaj pečata, znaka i zastave Saveza;
- i) zastupanje Saveza;
- j) uslove i postupak za spajanje, podjela Saveza, odnosno prestanak rada uključujući i bilo kakav poseban kvorum ili pravila za postizanje kvalifikovane većine u postupku glasanja;
- k) postupak za raspolaganje preostalim imovinom ili drugim sredstvima u slučaju raspuštanja ili prestanka rada Saveza;

#### 2. NAZIV, SKRAĆENI NAZIV I ADRESA SAVEZA

##### Član 5.

Puni naziv Saveza glasi:  
Savez lovačkih organizacija u Bosni i Hercegovini  
Savez lovačkih organizacija u Bosni i Hercegovini

Skraćeni naziv Saveza glasi:

SLO u BiH

SLO u BiH

СЛО у БиХ

Sjedište Saveza je u Sarajevu, ulica Petrakijina broj 24.

### 3. OSNOVNI PRINCIPI

#### Član 6.

Principi Saveza imaju opći karakter koji određuju formu i sadržinu rada Saveza, nalaze svoju primjenu i konkretizaciju u Statutu i drugim općim, odnosno pravnim aktima, služeći kao osnov za saznanje suštine rada Saveza, te su regulator u pravilnoj primjeni utvrđenih normi ovog statuta.

Osnovni principi rada Saveza su:

- Princip zakonitosti,
- Princip funkcionalne nadležnosti kroz rad,
- Princip dobrovoljnosti,
- Princip otvorenosti,
- Princip transparentnosti,
- Princip javnosti rada i
- Princip jednakosti članica u Savezu.

### 4. CILJEVI I DJELATNOSTI SAVEZA

#### Član 7.

Ciljevi i djelatnost Saveza su:

- unaprjeđenje lovstva;
- pružanje stručne pomoći kod donošenja i sprovođenja mjera gospodarenja lovištem, obrazovanjem i edukacijom lovaca u skladu sa članom 12. Zakona o lovstvu;
- dosljedno sprovođenje Zakona o lovstvu i drugih propisa o lovstvu i davanje prijedloga za njihovo unaprjeđenje;
- ostvarivanje jedinstvene lovne politike iz oblasti lovstva, kao i ostvarivanje odnosa sa inostranim lovačkim udruženjima;
- realizacija lovnog menadžmenta;
- doprinosi podizanju lovne kulture, razvijanju svijesti za zaštitu prirode i jačanju lovne etike i morala;
- ostvarivanje saradnje sa odgovarajućim organizacijama u Bosni i Hercegovini na poslovima i zadacima zaštite čovjekove okoline;
- podsticanje i korištenje naučno istraživačkog rada u oblasti lovstva;
- organizuje i provodi propagandu i informativnu aktivnost u lovstvu, putem izdavanja glasila „Lovački list“, te izdavačku djelatnost za potrebe članstva na način predviđen Zakonom;
- obavlja i druge poslove i zadatke u skladu sa Zakonom, kao i aktima Saveza;
- doprinosi razvoju kinološkog rada i sprovođenje kinoloških politika među članicama Saveza;
- ostvaruje saradnju sa svim nadležnim kinološkim institucijama u Bosni i Hercegovini, kao i sa resornim ministarstvima na nivou kantona, Federacije i države;
- daje opšte i stručne smjernice za razvoj lovne kinologije;
- organizuje kinološke manifestacije i izdaje certifikate o položenom ispitu u radu;
- posebno vodi brigu o uzgajivačima lovnih pasa, kao osnovnim nosiocima razvoja lovne kinologije;
- vodi evidenciju o svim ocjenjenim čistokrvnim lovačkim psima odgovarajuće pasmine za lovište, koji posjeduju rodni list (rodovnik, pedigree), u skladu sa Zakonom;
- vodi rodovnu knjigu i prateću dokumentaciju za lovne pasmine u skladu sa Pravilnikom o uzgoju i upisu pasa u rodovnu knjigu međunarodno priznate kinološke asocijacije.

Savez je član Međunarodnog vijeća za lov i zaštitu divljači CIC i Europske lovačke asocijacije FACE. Savez se može učlaniti i u druge međunarodne asocijacije, te ugovarati i na drugi način uspostavljati međunarodnu saradnju prema postojećim propisima.

Savez zbog svoje potpunije djelatnosti rada može učlaniti članicu čija je djelatnost neposredno vezana za Savez ili osnovati novu članicu Saveza, čija bi djelatnost pomogla u strukturalnom, finansijskom i materijalnom smislu Savezu, za djelatnosti koje nisu neposredno povezane sa djelatnostima Saveza iz člana 7. ovog Statuta, osnovati novo pravno lice, članicu, u skladu sa članom 4. Zakona.

## **5. POSTUPAK ZA PRIMANJE I ISKLJUČIVANJE ČLANICA**

### **Član 8.**

Članice Saveza su pravna lica koja su registrovana u Bosni i Hercegovini, koja se bave lovstvom, kao i unapređenjem i uzgojem, zaštitom i iskorištavanjem divljači, kao i pravna lica koja se bave djelatnošću šumarstva, lovstva i drugih srodnih djelatnosti.

Pravna lica iz stava 1. ovog člana, delegiraju svoje delegate u Skupštinu Saveza u skladu sa članom 16. ovog Statuta i dužna su da vode evidenciju svoga članstva koja je usklađena i ažurirana sa matičnom knjigom društva, kao i evidenciju o preuzetim i uplaćenim članskim markicama za svoje članstvo, za tekuću lovnu godinu.

Lovci svoje članstvo u lovačkoj organizaciji dokazuju članskom knjižicom i članskom markicom koju izdaje Savez.

Evidenciju iz stava 2. ovog člana, članice Saveza su dužne dostaviti Savezu do 30. april tekuće godine.

Organizacija koja želi postati članicom Saveza podnosi pismeni zahtjev Upravnom odboru Saveza koji razmatra podnešeni zahtjev, utvrđuje valjanost i utemeljenost podnešenog zahtjeva, posebnim pravilnikom kojim su propisani kriteriji za prijem i članstvo i u skladu sa Statutom.

### **Član 9.**

O prijemu u članstvo Saveza u konačnici odlučuje Skupština. Pravilnik o kriterijima za prijemu donosi Skupština.

### **Član 10.**

Savez vodi spisak svojih članica, sa osnovnim podacima i podacima neophodnim za rad Saveza.

Svaka članica Saveza može pokrenuti postupak pred nadležnim sudom za utvrđivanje ništavosti općeg akta Saveza koji je donijet suprotno odredbama Statuta ili drugog općeg akta Saveza, a najkasnije u roku od šest mjeseci od dana donošenja tog akta.

### **Član 11.**

Članstvo članice u Savezu prestaje:

1. neplaćanjem članarine ;
2. na vlastiti zahtjev, potpisivanjem izjave o istupanju iz Saveza ;
3. nepoštivanjem i nepridržavanjem odredbi potpisanog ugovora sa Savezom;
4. isključenjem članice, u slučaju djelovanja u suprotnosti sa ciljevima, djelatnostima, Statutom Saveza, aktima Saveza, te općenito interesima Saveza;
5. prestankom svojstva pravnog lica.

### **Član 12.**

Svaka članica Saveza može slobodno i dobrovoljno istupiti iz članstva. Sa odlukom članice Saveza o istupanju iz članstva, upoznaje se Upravni odbor Saveza, nakon čega se vrši evidentiranje istupanja.

### **Član 13.**

Odluku o prestanku svojstva članice Saveza donosi Upravni odbor Saveza.

Članica Saveza koja je nezadovoljana odlukom Upravnog odbora Saveza iz prethodnog stava, može podnijeti žalbu Skupštini Saveza, u roku od 15 dana od dana prijema odluke.

Skupština razmatra žalbu, na prvoj narednoj sjednici Skupštine Saveza i donosi konačnu odluku.

## **5.1 PRAVA, DUŽNOSTI I ODGOVORNOSTI ČLANICA SAVEZA**

### **Član 14.**

Prava članica Saveza su:

1. da biraju organe Saveza i da u njih budu birani;
2. da daju prijedloge, mišljenja i sugestije;
3. da prate rad Saveza i pokreću inicijative za rješavanje pitanja od interesa za Savez;
4. da budu redovno informirani o radu i rezultatima rada Saveza;
5. da u zaštiti svojih prava ostvaruju pomoć Saveza.

Dužnosti članice Saveza su:

1. da učestvuju u aktivnostima Saveza;
2. da savjesno i odgovorno izvršavaju povjerene poslove i zadatke u vezi sa radom i aktivnostima Saveza;
3. da propagiraju djelatnost Saveza;
4. da redovno izvršavaju preuzete obaveze iz ugovora prema Savezu i provode odluke, stavove i zaključke organa Saveza;
5. da uredno i na vrijeme izmiruju članarinu zaključno sa 30. aprilom tekuće godine;
6. da se pridržavaju odredaba ovog Statuta i drugih akata Saveza.

Oblici odgovornosti članova organa Saveza, članica i njenih članova će se definirati „Pravilnikom o disciplinskoj odgovornosti članova organa Saveza, članica i njenih članova “ kojeg donosi Upravni odbor Saveza.

## **6. ORGANI SAVEZA, NAČIN NA KOJI SE BIRAJU, OVLAŠTENJA KOJA IMAJU, KVORUM I PRAVILA GLASANJA, TRAJANJE MANDATA, OSOBA OVLAŠTENA DA SAZOVE SKUPŠTINU, USLOVI I NAČIN RASPUŠTANJA, ODNOSNO PRESTANAK RADA SAVEZA**

### **Član 15.**

Organi Saveza su:

1. SKUPŠTINA SAVEZA
2. PREDSDJEDNIK I POTPREDSDJEDNIK SAVEZA
3. UPRAVNI ODBOR SAVEZA
4. NADZORNI ODBOR SAVEZA
5. SUD ČASTI-DISCIPLINSKI SUD
6. DISCIPLINSKI TUŽILAC I ZAMJENIK DISCIPLINSKOG TUŽIOCA
7. ARBITRAŽNI SUD SAVEZA

### **Član 16.**

#### **1. SKUPSTINA SAVEZA**

Skupština je najviši organ Saveza koju čine članovi Upravnog odbora Saveza i delegati, delegirani od svake članice Saveza, a koji imaju jednaka prava glasa. Delegati Skupštine mogu biti lica koja nisu disciplinski kažnjena od strane matične lovačke organizacije ili Saveza lovačkih organizacija u BiH odnosno lica koja nisu pravosnažno osuđena za krivično djelo iz oblasti lovstva.

Članice koje nisu potpisale ugovor sa punim obavezama prema Savezu (streljačka udružena, preduzeća šumarstva i sl.) mogu formirati klub kojeg čine do tri članice koji ima pravo na jednog (1) delegata,

Članice koje imaju od 3 do 350 članova, delegiraju jednog (1) delegata;

Članice koje imaju od 351 do 600 članova, delegiraju dva (2) delegata;

Članice koje imaju od 601 do 850 članova, delegiraju tri (3) delegata;

Članice koje imaju više od 851 člana, delegiraju četiri (4) delegata.

Broj članova svake članice Saveza se utvrđuje na osnovu evidencije koju vodi Stručna služba Saveza, a broj delegata za Skupštinu se utvrđuje na osnovu preuzetih i uplaćenih članskih markica u prethodnoj godini. Skupština ima predsjednika i potpredsjednika koji se na prijedlog članice biraju iz reda delegata na mandatni period od 4 godine sa mogućnošću ponovnog izbora više puta.

Kandidati za predsjednika i potpredsjednika Skupštine Saveza mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti lovstva i aktivni su članovi jedne od članice Saveza koja redovno izvršava sve obaveze prema Savezu koje su propisane Statutom i drugim aktima Saveza.

Predsjednik i potpredsjednik Skupštine prilikom izbora ne mogu biti iz istog kantona.

Uz predsjednika Skupštine u radnom predsjedništvu su po funkciji potpredsjednik Skupštine, i jedan član koji se bira iz reda delegata. Ukoliko nisu prisutni predsjednik ili potpredsjednik Skupštine biraju se dva člana iz reda delegata.

Skupština Saveza može biti:

- izborna;
- redovna;
- vanredna.

Izborna Skupština održava se svako četiri godine, u skladu sa Statutom Saveza, radi izbora organa Saveza.

Redovna Skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Saveza.

Izbornu i redovnu Skupštinu saziva predsjednik Skupštine i istom predsjedava.

Obavijest o održavanju zasjedanja Skupštine dostavlja se najkasnije 30 dana prije održavanja, a materijali se dostavljaju najkasnije 15 dana prije njenog zasjedanja.

Vanredna Skupština saziva se izuzetno, u slučaju nepredviđenih teškoća u radu, poremećaja međuljudskih odnosa ili drugih okolnosti kada je ugrožen rad i vitalni interesi Saveza.

Na vanrednoj Skupštini samo se raspravlja o tački koja je predviđena dnevnim redom bez mogućnosti dopunjavanja na dan održavanja Skupštine.

Predsjednik Skupštine je dužan sazvati vanrednu Skupštinu u slučaju kada to zahtijeva najmanje 1/3 članica Saveza ili kada to opravdano zatraži Upravni odbor.

Ako predsjednik Skupštine ne sazove Skupštinu u roku od 30 dana u slučajevima iz prethodnog stava, odluku o sazivanju Skupštine i dnevni red donijet će Upravni odbor Saveza.

Prilikom početka zasjedanja Skupštine, vrši se verifikacija broja delegata delegiranih u Skupštinu Saveza.

Glasanje na zasjedanju Skupštine je javno, izuzev ukoliko Skupština na samoj sjednici ne utvrdi potrebu za tajnim glasanjem.

Kvorum za rad i održavanje Skupštine je nadpolovična većina svih delegata Skupštine.

Skupština donosi odluke natpolovičnom većinom prisutnih delegata Skupštine.

O radu Skupštine, načinu glasanja, zapisniku i drugim bitnim stvarima za rad Skupštine donijet će se Poslovnik o radu Skupštine. Poslovnik o radu Skupštine na prijedlog Upravnog odbora donosi Skupština.

## **Član 17.**

Predsjednik Skupštine obavlja sljedeće aktivnosti:

- stara se o organizovanju Skupštine i saziva njene sjednice;
- predlaže dnevni red sjednice;
- predsjedava sjednicama Skupštine u skladu sa Statutom i Poslovnikom o radu Skupštine;



- potpisuje akte Skupštine;
- stara se o izvršavanju odluka, zaključaka i drugih akata Skupštine;
- koordinira rad Skupštine;
- vrši i druge poslove koje mu odredi Skupština u skladu sa Zakonom i ovim Statutom;
- prisustvuje sjednicama Upravnog odbora i učestvuje u njegovom radu.

U slučaju da je predsjednik Skupštine iz nekog razloga spriječen ili odsutan, sve poslove iz člana 17. ovog Statuta obavljat će potpredsjednik Skupštine Saveza.

### **Član 18.**

Predsjednik i potpredsjednik Skupštine mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;
- u slučaju smrti;
- ako ne prisustvuju sjednicama Skupštine tri puta neopravdano;
- ako pravilno ne obavljaju svoje zadatke u skladu sa Statutom i Poslovnikom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva;
- ako matična lovačka organizacija u kojoj je Predsjednik ili potpredsjednik Skupštine član (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu Predsjednika ili potpredsjednika Skupštine odlučuje Skupština, natpolovičnom većinom glasova prisutnih delegata Skupštine.

### **Član 19.**

Skupština Saveza:

- donosi Statut, izmjene i dopune Statuta, Poslovnik o radu Skupštine i druga opća akta Saveza određena Statutom;
- odlučuje o spajanju, podjeli i prestanku rada, kao i o drugim statusnim promjenama Saveza;
- usvaja godišnji program i plan rada Saveza;
- donosi finansijski plan, odluku o izvršenju finansijskog plana i usvaja izvještaj o izvršenju finansijskog plana Saveza ;
- razmatra i usvaja izvještaje koje je pripremio Upravni i Nadzorni odbor Saveza i drugi organi Saveza.
- odlučuje o visini i načinu plaćanja članarine;
- imenuje i razrješava predsjednika i zamjenika predsjednika Skupštine Saveza;
- imenuje i razrješava predsjednika i potpredsjednika Skupštine, članove Upravnog, Nadzornog odbora, predsjednika i potpredsjednika Saveza, Sud časti-Disciplinski sud i Arbitražni sud Saveza;
- imenuje osobe ovlaštene za zastupanje Saveza;
- rješava po žalbama članica Saveza, u drugom stepenu;
- donosi odluku o promjeni naziva i znaka Saveza;
- odlučuje o svim drugim pitanjima koja nisu u nadležnosti drugih organa Saveza.

## **2. PREDSEDNIK I POTPREDSJEDNIK SAVEZA**

### **Član 20.**

Savez ima predsjednika i potpredsjednika Saveza, koje na prijedlog najmanje 5 članica Saveza članica imenuje i razrješava Skupština, na mandatni period od četiri godine, sa mogućnošću ponovnog izbora više puta. Kandidati za predsjednika i potpredsjednika Saveza mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti

lovstva i aktivni su članovi najmanje 15 godina jedne od članice Saveza koja redovno izvršava sve obaveze prema Savezu koje su propisane Statutom i drugim aktima Saveza.

Izborom predsjednika i potpredsjednika Saveza umanjuje za jedan broj članova Upravnog odbora za kanton iz kojeg je izabran Predsjednik i Potpredsjednik i ne mogu biti birani iz istog kantona.

Predsjednik i potpredsjednik Saveza su ujedno članovi Upravnog odbora i predsjednik i potpredsjednik Upravnog odbora Saveza.

## Član 21.

Predsjednik Saveza ima sljedeća prava, dužnosti i odgovornosti:

- zastupa Savez u pravnom prometu;
- saziva i predsjedava sjednicama Upravnog odbora samoinicijativno ili na zahtjev najmanje 1/3 članova Upravnog odbora;
- predlaže dnevni red Upravnog odbora;
- rukovodi radom Saveza i organizira rad;
- odgovoran je za zakonitost rada Saveza;
- stara se o pravilnom korištenju imovine Saveza o urednom obavljanju materijalo finansijskog poslovanja, zakonitom i blagovremenom vršenju stručnih i administrativnih poslova;
- odlučuju o upotrebi sredstava za realizaciju ciljeva i djelatnosti Saveza;
- naredbodavac je u izvršenju finansijskog plana Saveza;
- stara se o izvršenju odluka, zadataka i zaključaka Skupštine;
- podnosi izvještaj o radu Skupštini;
- priprema i predlaže nacrt budžeta za rad Saveza, Upravnom odboru i Skupštini;
- koordinira rad organa Saveza i donosi odluke o pitanjima rada Saveza, osim onih koji su u isključivoj nadležnosti Skupštine i Upravnog odbora Saveza;
- stara se o provođenju programa rada, odluka, zaključaka i smjernica Skupštine;
- stara se o provođenju plana rada Upravnog odbora;
- sačinjava godišnji i polugodišnji izvještaj o svom radu i podnose ga Upravnom odboru na razmatranje i usvajanje;
- potpisuje akte koje donosi Upravni odbor;
- održava stalne kontakte sa javnošću i promoviranje ciljeva Saveza;
- vrši i druge poslove koje mu odredi Skupština i Upravni odbor Saveza.

U slučaju spriječenosti predsjednika Saveza, sve poslove iz prethodnog stava obavljat će potpredsjednik Saveza.

## Član 22.

Predsjednik i Potpredsjednik Saveza mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;
- u slučaju smrti;
- ako ne prisustvuju sjednicama Upravnog odbora tri puta neopravdano;
- ako pravilno ne obavljaju svoje zadatke u skladu sa Statutom i Poslovníkom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva;
- ako matična lovačka organizacija u kojoj je Predsjednik ili Potpredsjednik Saveza član (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu Predsjednika ili Potpredsjednika Saveza odlučuje Skupština, natpolovičnom većinom glasova prisutnih delegata Skupštine.

### 3. UPRAVNI ODBOR

#### Član 23.

Upravni odbor se sastoji od 15 članova i izvršni je organ Saveza.

Upravni odbor je sastavljen od Predsjednika Saveza lovačkih organizacija u BiH, Potpredsjednika Saveza lovačkih organizacija u BiH, Predsjednika Lovnog kinološkog Saveza u Federaciji Bosne i Hercegovine, Predsjednika Skupštine Saveza lovačkih organizacija u BiH, i članova iz reda delegata.

Mandat Predsjednika Lovnog kinološkog saveza u FBiH verifikuje Skupština Saveza.

Članovi Upravnog odbora na prijedlog članice biraju se iz reda delegata Skupštine Saveza, vodeći računa da svaki kanton ima svog zastupnika u Upravnom odboru, proporcionalno broju članova-lovaca, i to na način:

<i>Broj članova na nivou kantona</i>	<i>Broj članova Upravnog odbora</i>
<i>500-1500</i>	<i>1</i>
<i>1501-3000</i>	<i>2</i>
<i>preko 3001</i>	<i>3</i>

Predloženi kandidati za članove Upravnog odbora mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti lovstva, i aktivni su članovi najmanje 15 godina jedne od članice Saveza koja redovno izvršava sve obaveze prema Savezu koje su propisane Statutom i drugim aktima Saveza.

Članove Upravnog odbora bira i razrješava Skupština Saveza na mandatni period od četiri godine sa mogućnošću ponovnog izbora više puta.

Kvorum za održavanje sjednice Upravnog odbora je natpolovična većina svih članova Upravnog odbora. Upravni odbor donosi odluke natpolovičnom većinom ukupnog broja članova Upravnog odbora.

Pored članova Upravnog odbora, sjednicama mogu prisustvovati i druge osobe koje su vezane za realizaciju određenih zadataka, ali bez prava odlučivanja.

Upravni odbor se sastaje najmanje četiri puta godišnje.

Svaki član Upravnog odbora odgovoran je za svoj rad Skupštini Saveza.

#### Član 24.

Upravni odbor Saveza obavlja:

- priprema nacrt Statuta, njegove izmjene i dopune i druge akte, koje donosi Skupština;
- provodi utvrđenu politiku, zaključke i druge odluke koje je donijela Skupština;
- upravlja imovinom Saveza;
- utvrđuje i predlaže finansijski plan za ostvarivanje, korištenje i raspolaganje sredstvima Saveza, koji donosi Skupština;
- daje prijedloge, mišljenja i inicijative za ostvarivanje ciljeva i djelatnosti Saveza;
- razmatra zahtjeve za učlanjenje novih članica, utvrđuje valjanost i utemeljenost podnešenog zahtjeva, i prosljeđuje Skupštini na konačno odlučivanje;
- razmatra zahtjeve za prestanak članstva članice, i prosljeđuje Skupštini na konačno odlučivanje;
- podnosi godišnji i periodični izvještaj o svom radu Skupštini na razmatranje i usvajanje;
- obrazuje komisije, odbore i stručne timove radi realizacije postavljenih ciljeva i djelatnosti Saveza;
- imenuje uređivački odbor Lovskog lista;
- imenuje glavnog urednika Lovskog lista;
- imenuje Disciplinskog tužioca i Zamjenika disciplinskog tužioca;
- imenuje Stručni savjet za lovstvo;
- utvrđuje godišnji obračun o izvršenju plana prihoda i rashoda Saveza;
- poduzima mjere i aktivnosti na ostvarivanju programa rada Saveza;
- priprema analize, informacije i druge materijale za Skupštinu;
- pravi provedbu finansijskog plana rada Saveza i donosi odluke o upotrebi sredstava;
- rješava po žalbama članica i članova, gdje je odluka konačna;
- donosi Poslovnik o radu Upravnog odbora Saveza;
- razmatra i verifikuje Pravilnik o unutarnjem uređenju Stručne službe;



- donosi odluku o zaposlenju ili otpuštanju uposlenika Saveza;
- daje mišljenje u postupku dodjele lovišta na gazdovanje, kao i mišljenje u postupku oduzimanja lovišta u skladu sa pravilnikom;
- obavlja i druge poslove u skladu sa Zakonom i ovim Statutom ili ukoliko to odredi Skupština Saveza.

#### **Član 25.**

Članovi Upravnog odbora mogu biti opozvani i prije isteka mandata na koje su izabrani i to:

- na sopstveni zahtjev;
- u slučaju smrti;
- ako ne prisustvuju sjednicama Upravnog odbora tri puta neopravdano;
- ako pravilno ne obavljaju svoje zadatke u skladu sa Statutom i Poslovnikom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva
- ako matična lovačka organizacija u kojoj je član Upravnog odbora učlanjen (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu člana Upravnog odbora odlučuje Skupština, natpolovičnom većinom glasova prisutnih delegata Skupštine.

#### **Član 26.**

Upravni odbor može, radi efikasnijeg i racionalnijeg izvršavanja svojih poslova i zadataka, posebnom odlukom obrazovati komisije, radna tijela, odbore, stručne timove, sekcije i sl.

Odlukom iz prethodnog stava utvrđuje se sastav, djelokrug, broj članova i način ostvarenja odgovornosti ovih radnih tijela.

### **4. NADZORNI ODBOR**

#### **Član 27.**

Nadzorni odbor ima tri člana koje na prijedlog članice bira Skupština Saveza iz reda delegata na mandatni period od četiri godine sa mogućnošću ponovnog izbora više puta. Kandidati za člana Nadzornog odbora mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti lovstva.

#### **Član 28.**

Nadzorni odbor kontrolira finansijsko poslovanje Saveza i o uočenim nepravilnostima bez odlaganja izvještava Upravni odbor.

Nadzorni odbor dužan je prema potrebi, a najmanje jedanput godišnje, pregledati finansijsko-materijalno poslovanje Saveza. O svom radu Nadzorni odbor izvještava Upravni odbor i Skupštinu Saveza najmanje jedanput godišnje.

Nadzorni odbor dužan je upozoriti na nepravilan rad organa Saveza, na propuste u primjeni odredaba Statuta te na nezakonito i nenamjensko trošenje sredstava Saveza.

Svi organi Saveza dužni su Nadzornom odboru davati podatke, omogućiti mu uvid u dokumentaciju i druge podatke koje zatraži te ga izvijestiti o tome šta su učinili u vezi s njegovim nalazima i prijedlozima.

#### **Član 29.**

Sjednicom Nadzornog odbora predsjedava predsjednik Nadzornog odbora koji se bira na prvoj konstituirajućoj sjednici Nadzornog odbora.

Sjednice Nadzornog odbora saziva predsjednik Nadzornog odbora sam ili na zahtjev predsjednika Upravnog odbora Saveza ili pojedinog člana Nadzornog odbora.

### **Član 30.**

Članovi Nadzornog odbora mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;
- u slučaju smrti;
- ako ne prisustvuju sjednicama Nadzornog odbora tri puta neopravdano;
- ako pravilno ne obavljaju svoje zadatke u skladu sa Statutom i Poslovníkom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđena za krivično djelo iz oblasti lovstva
- ako matična lovačka organizacija u kojoj je član Nadzornog odbora učlanjen (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu člana Nadzornog odbora odlučuje Skupština, natpolovičnom većinom glasova prisutnih delegata Skupštine.

## **5. SUD ČASTI-DISCIPLINSKI SUD**

### **Član 31.**

Radi zaštite etičkih normi članova organa Saveza kao i članova unutar članica Saveza Skupština Saveza imenuje Sud Časti-Disciplinski sud.

Sud Časti-Disciplinski sud ima tri člana koje na prijedlog članice iz reda delegata bira Skupština Saveza, na mandatni period od četiri godine, s mogućnosti ponovnog izbora više puta. Kandidati za člana Suda časti-Disciplinskog suda mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti lovstva.

### **Član 32.**

Sud Časti- Disciplinski sud je nadležan za:

- utvrđuje činjenično stanje u svakom konkretnom slučaju;
- ocjenjuje da li se radi o povredi profesionalne etike od strane prijavljenog člana iz članice Saveza;
- odlučuje o povredama etičkih normi članica Saveza;
- odlučuje o povredama etičkih i drugih normi članova organa Saveza;
- izriče sankcije-disciplinske mjere.

Provođenje disciplinskog postupka ne izuzima od odgovornosti po osnovu Zakona i propisa koji su na snazi u BiH, a naručito po osnovu krivične i prekršajne odgovornosti.

### **Član 33.**

Način rada i postupanja Suda časti propisat će se „Pravilnikom o disciplinskom postupku i disciplinskoj odgovornosti članova organa Saveza, članova članica Saveza i članica Saveza“.

Pravilnik o disciplinskom postupku i disciplinskoj odgovornosti članova organa Saveza , članova članica Saveza i članica Saveza“ donosi Upravni odbor Saveza.

### **Član 34.**

Članovi Suda časti mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;

- u slučaju smrti;
- ako ne prisustvuju sjednicama Suda časti tri puta neopravdano;
- ako pravilno ne obavljaju svoje zadatke u skladu sa Statutom i Poslovníkom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva ;
- ako matična lovačka organizacija u kojoj je član Suda časti učlanjen (odnosno ispred koje je kandidovan za organe Saveza) uz validno obrazloženje donese odluku o njegovoj, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu člana Suda časti odlučuje Skupština, natpolovičnom većinom glasova prisutnih delegata Skupštine.

## **6. DISCIPLINSKI TUŽILAC I ZAMJENIK DISCIPLINSKOG TUŽIOCA**

### **Član 35.**

Za vođenje disciplinskog postupka i podnošenje disciplinske optužnice protiv člana organa Saveza, člana članice i članice Saveza nadležan je disciplinski tužilac. Ukoliko je disciplinski tužilac spriječen njegove poslove će obavljati Zamjenik disciplinskog tužioca.

### **Član 36.**

Disciplinskog tužioca i njegovog zamjenika imenuje Upravni odbor na mandatni period od 4 godine sa mogućnošću ponovnog izbora više puta.

### **Član 37.**

Kandidat za disciplinskog tužioca i njegovog zamjenika može biti istaknuti lovac sa najmanje 10 godina lovačkog staža koji nije disciplinski osuđivan od strane matične lovačke organizacije ili Saveza odnosno lice koje nije pravosnažno osuđena za krivično djelo iz oblasti lovstva.

### **Član 38.**

Disciplinski tužilac pokreće disciplinski postupak na osnovu prijave Upravnog odbora.

### **Član 39.**

Način rada disciplinskog tužioca je regulisan „Pravilnikom o disciplinskom postupku i disciplinskoj odgovornosti članova organa Saveza , članova članica Saveza i članica Saveza“ koji donosi Upravni odbor Saveza“.

### **Član 40.**

Disciplinski tužioc i njegov zamjenik mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;
- u slučaju smrti;
- ako ne prisustvuju sjednici Suda časti tri puta neopravdano;
- ako pravilno ne obavljaju svoje zadatke u skladu sa Statutom i Poslovníkom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva;
- ako matična lovačka organizacija u kojoj disciplinski tužioc ili njegov zamjenik učlanjen (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Upravnom odboru Saveza najkasnije 15 (petnaest) dana prije održavanja sjednice.

O opozivu disciplinskog tužioca i njegovog zamjenika odlučuje Upravni odbor Saveza, natpolovičnom većinom glasova prisutnih članova Upravnog odbora.

## **7. ARBITRAZNI SUD**

### **Član 41.**

Arbitražni sud se sastoji od tri člana koje na prijedlog članice iz reda delegata bira Skupština Saveza, na mandatni period od četiri godine sa mogućnošću ponovnog izbora više puta. Kandidati za člana Arbitražnog suda mogu biti lica koja nisu disciplinski osuđivana od strane matične lovačke organizacije ili Saveza odnosno lica koja nisu pravosnažno osuđena za krivično djelo iz oblasti lovstva.

### **Član 42.**

Arbitražni sud na zahtjev članica Saveza rješava njihove međusobne sporove saglasno važećim zakonskim propisima i u skladu sa lovnom politikom Saveza.

### **Član 43.**

Odluke Arbitražnog suda za članice Saveza su obavezne.

Sva bitna pitanja za rad i postupanje, kao i donošenje odluka Arbitražnog suda regulirat će se posebnim pravilnikom koji donosi Upravni odbor Saveza.

### **Član 44.**

Žalbu na odluku Arbitražnog suda članovi Saveza mogu uputiti Arbitražnom sudu kao prvostepenom organu, i Skupštini Saveza čija je odluka u drugostepenom postupku konačna.

### **Član 45.**

Članovi Arbitražnog suda mogu biti razriješeni i prije isteka mandata na koji su imenovani, u sljedećim slučajevima:

- na sopstveni zahtjev;
- u slučaju smrti;
- ako ne prisustvuju sjednici Arbitražnog suda tri puta neopravdano;
- ako pravilno ne obavljaju svoje zadatke u skladu sa Statutom i Poslovnikom o radu;
- ako svojim radnjama ruše ugled Saveza;
- ako su disciplinski kažnjeni od strane matične lovačke organizacije ili Saveza;
- ukoliko su pravosnažno osuđeni za krivično djelo iz oblasti lovstva ;
- ako matična lovačka organizacija u kojoj je član Arbitražnog suda učlanjen (odnosno ispred koje je kandidovan za organe Saveza) uz validno obrazloženje donese odluku o njegovoj zamjeni, i prijedlog za njegovu zamjenu dostave Skupštini Saveza najkasnije 15 (petnaest) dana prije održavanja Skupštine.

O opozivu člana Arbitražnog suda odlučuje Skupština, natpolovičnom većinom glasova prisutnih delegata Skupštine.

## **STRUČNA SLUŽBA SAVEZA**

### **Član 46.**

Sekretara Saveza (u daljnjem tekstu: Sekretar) bira Upravni odbor na prijedlog Predsjednika Saveza prema uvjetima propisanim Pravilnikom o unutarnjem uređenju Stručne službe.

Sekretar je uposlenik Saveza na neodređeno vrijeme. Sekretar za svoj rad odgovara Upravnom odboru i Predsjedniku Saveza.

Obavljanje poslova i radnih zadataka u okviru stručne službe, bit će potpunije uređeno aktom o unutrašnjoj organizaciji i sistematizaciji poslova i radnih zadataka Saveza, kojeg donosi Upravni odbor Saveza.

## Član 47.

Nadležnosti sekretara Saveza su:

- saraduje sa predsjednikom Upravnog odbora u pripremanju sjednica Upravnog odbora i predsjednikom Skupštine Saveza u pripremi sjednica Skupštine Saveza;
- pomaže u rukovođenju rada Saveza između dvije sjednice Upravnog odbora Saveza;
- prisustvuje sjednicama Upravnog odbora, bez prava glasa, vodi i sačinjava zapisnik i izvještaje sa sjednica Upravnog odbora Saveza, drugih organa i komisija Saveza;
- stara se o ispunjavanju planova i programa rada Saveza;
- aktivno učestvuje u pripremi sjednica Upravnog odbora i drugih tijela i komisija;
- stara se o korespondenciji i administrativnim poslovima Saveza;
- prati dokumentaciju o finansijskom poslovanju Saveza;
- obavlja i druge poslove koje mu se povjeri od strane organa Saveza.

## Član 48.

Opće, stručno-administrativne, pomoćne i druge poslove Saveza i njegovih organa obavlja Stručna služba.

Uređenje, djelatnost, odgovornost i način rada Stručne službe propisan je Pravilnikom o unutarnjem uređenju Stručne službe Saveza. Stručnom službom rukovodi Sekretar.

## Član 49.

Savez ima Stručni savjet za lovstvo, imenuje ga i razrješava Upravni odbor Saveza.

Stručni savjet za lovstvo čine naučni stručni radnici, kao i druge osobe koje se bave problematikom lovstva.

Radom Stručnog savjeta za lovstvo rukovodi predsjednik koji se bira iz reda njegovih članova.

Stručni savjet za lovstvo, polazeći od naučni i stručnih saznanja iz oblasti lovstva, razmatra stanje i probleme i predlaže Upravnom odboru Saveza mjere za uspješnu zaštitu divljači i unapređenje lovstva i lovišta.

## **PRAVILA ZA OSTVARIVANJE, UPOTREBU I RASPOLAGANJE SREDSTVIMA SAVEZA, KAO I TIJELO KOJE JE OVLAŠTENO ZA NADZOR NAD UPOTREBOM TIH SREDSTAVA**

## Član 50.

Prihodi Saveza su:

- članarina;
- dobrovoljni prilozi i pokloni fizičkih i pravnih lica, kako inozemnih tako i domaćih, u gotovini, uslugama ili imovini bilo koje vrste;
- državne subvencije i ugovori sa fizičkim i pravnim licima, kako domaćim tako i inozemnim;
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- prihodi stečeni kroz ostvarivanje ciljeva i aktivnosti Saveza u skladu sa Zakonom i ovim Statutom;
- sredstva dobivena iz opštinskih, kantonálnih, federalnih i državnih izvora;

## Član 51.

Savez je dužan voditi evidenciju o imovini u skladu sa važećim Zakonskim propisima.

Savez je dužan da propisno vodi poslovne knjige u skladu sa općeprihvaćenim računovodstvenim principima i da sastavlja finansijske izvještaje u skladu sa Zakonom.

## Član 52.

Sredstva Saveza mogu se koristiti isključivo za ostvarivanje ciljeva i djelatnosti Saveza predviđenih Statutom.

### **Član 53.**

Ostvarivanje, korištenje i raspolaganje sredstvima Saveza utvrđuje se finansijskim planom, kojeg donosi Skupština, na prijedlog Upravnog odbora Saveza.

O upotrebi (korištenju) sredstava, u skladu sa finansijskim planom, odlučuje Upravni odbor.

### **Član 54.**

Nadzor nad upotrebom imovine i sredstava Saveza vrši Nadzorni odbor koji podnosi izvještaj o radu Skupštini Saveza.

### **Član 55.**

Upravni odbor je dužan, najmanje jednom godišnje, podnijeti Skupštini izvještaj sa podacima o imovini Saveza, prihodima, rashodima i drugim pitanjima od značaja za raspolaganje imovinom i za finansijsko poslovanje Saveza.

### **Član 56.**

Imovinu Saveza čine novčana sredstva, pokretna i nepokretna imovina i prava koja Savez stiče, u skladu sa Zakonom i ovim Statutom.

Za obaveze prema trećim licima, Savez odgovara cjelokupnom svojom imovinom.

### **Član 57.**

Radi izvršavanja određenih poslova Upravni odbor može angažovati odgovarajuća stručna lica, uz naknadu, a u skladu sa Zakonom o radu u institucijama Bosne i Hercegovine i mogućnostima Saveza.

## **JAVNOST RADA**

### **Član 58.**

Rad Saveza je javan. Javnost rada ostvaruje se neposrednim informisanjem i putem sredstava javnog informisanja za značajnije aktivnosti.

Svim članovima omogućit će se neometan uvid u obavljanje aktivnosti na svim područjima na kojima djeluje ovo Savez, kao i planiranje daljnjih aktivnosti

### **Član 59.**

Članovi Saveza moraju biti redovno informisani o radu Saveza.

Za javnost rada odgovoran je Predsjednik Saveza.

## **POSTUPAK ZA IZMJENU I DOPUNU STATUTA I OPĆI AKTI SAVEZA**

### **Član 60.**

Inicijativu za izmjene i dopune Statuta može podnijeti najmanje 1/3 članica Saveza i Upravni odbor.

Inicijativa se podnosi Skupštini pismenim putem i sa odgovarajućim obrazloženjem.

O izmjenama i dopunama Statuta odlučuje Skupština 2/3 većinom glasova svih delegata Saveza. Predsjednik Skupštine potpisuje odluku o izmjenama i dopunama Statuta.

### **Član 61.**

Pored Statuta, organi Saveza mogu donositi i druge akte i to:

- odluke, rješenja;
- pravilnike;



- poslovnike.

Akti Saveza moraju biti u skladu sa Zakonom i Statutom Saveza.

#### **Član 62.**

Odluke i rješenja se donose u slučajevima kada je to izričito utvrđeno Zakonom i ovim Statutom, kao i u drugim slučajevima kada se na opći način uređuje pitanje od značaja za ostvarivanje ciljeva i djelatnosti Saveza.

#### **Član 63.**

Pravilnikom se uređuju odnosi između članova Saveza, kao i međusobni odnosi organa Saveza u ostvarivanju njihovih nadležnosti.

#### **Član 64.**

Poslovníkom se bliže uređuje način rada organa Saveza.

#### **Član 65.**

Originalni primjerci akata Saveza čuvaju se u arhivi Saveza.

### **OPIS OBLIKA I SADRŽAJA , PEČATA, ZNAKA SAVEZA I ZASTAVE SAVEZA**

#### **Član 66.**

Savez ima pečat okruglog oblika, prečnika 40 mm, obrubljen sa dvije crte između kojih je kružno ispisan naziv Saveza latiničnim pismom: Savez lovačkih organizacija u Bosni i Hercegovini, sa sjedištem Saveza: Sarajevo, a u sredini pečata je znak Saveza.

Savez može imati više pečata, s tim što svaki mora biti numerisan brojevima. Za čuvanje i upotrebu pečata zadužen je predsjednik Saveza.

Savez ima svoj znak. Znak saveza je modificirani lik glave divokoze oivičen sa grančicama zelene boje, ispod kojeg piše puni naziv Saveza: Savez lovačkih organizacija u Bosni i Hercegovini.

Zastava Saveza je maslinaste boje, zlatnim nitima izvezen znak Saveza i tekst "Savez lovačkih organizacija u Bosni i Hercegovini".

### **ZASTUPANJE SAVEZA**

#### **Član 67.**

Predsjednik i potpredsjednik Saveza zastupaju Savez u pravnom prometu.

U slučaju spriječenosti predsjednika Saveza, u skladu sa prvim zastupanje će obavljati Potpredsjednik Saveza.

#### **Član 68.**

U postupcima u kojima Savez učestvuje kao stranka radi ostvarivanja svojih prava, dužnosti i odgovornosti pred nadležnim organima, sudovima i sl. predsjednik Saveza može dati pismenu punomoć za zastupanje advokatu ili drugom stručnom licu.

### **STATUSNE PROMJENE I PRESTANAK RADA SAVEZA, POSTUPAK ZA RASPOLAGANJE PREOSTALOM IMOVINOM ILI DRUGIM SREDSTVIMA SAVEZA U SLUČAJU RASPUŠTANJA ILI PRESTANKA RADA SAVEZA**

#### **Član 69.**

Savez se može spojiti i podijeliti u drugo udruženje u skladu sa Zakonom i ovim statutom.

Odluku o statusnim promjenama iz prethodnog stava donosi Skupština Saveza 2/3 većinom svih delegata Skupštine.

#### **Član 70.**

Savez prestaje sa radom dobrovoljno ili po sili Zakona.

Inicijativu za prestanak rada Saveza može pokrenuti najmanje 1/3 prisutnih delegata Skupštine i Upravni odbor:

- ako je proteklo dvostruko više vremena od vremena utvrđenog statutom Saveza za održavanje Skupštine, a Skupština Saveza nije održana;
- ako se broj članica Saveza smanji ispod broja tri;
- u drugim slučajevima utvrđenim Zakonom i ovim statutom.

Odluku o dobrovoljnom prestanku rada Saveza donosi Skupština Saveza 2/3 većinom svih delegata Skupštine Saveza.

Savez prestaje sa radom po sili Zakona, u skladu sa odredbama članova 49., 50. i 51. zakona o udruženjima i fondacijama Bosne i Hercegovine.

#### **Član 71.**

Savez je dužan prijaviti svaku promjenu upisa nadležnom Ministarstvu, u roku od 30 dana od nastale promjene, u skladu sa Zakonom.

### **RASPOLAGANJE PREOSTALOM IMOVINOM**

#### **Član 72.**

U slučaju donošenja odluke o prestanku rada Saveza, Skupština donosi plan likvidacije, kojim se utvrđuje raspored imovine, prava i obaveza Saveza. Skupština imenuje likvidatora imovine Saveza, čija je dužnost da se stara o sastavljanju plana likvidacije imovine Saveza.

Imovina kod raspuštanja i prestanka rada Saveza, nakon izmirenja zakonskih obaveza, dodijelit će se drugom udruženju koje obavlja iste ili slične statutarne djelatnosti, na osnovu odluke Skupštine.

### **PRIZNANJA I NAGRADE**

#### **Član 73.**

Savez dodjeljuje priznanja i odlikovanja Saveza.

Priznanja i odlikovanja dodjeljuje Upravni odbor, na prijedlog Komisije za dodjelu odlikovanja i priznanja, a koju na prijedlog Predsjednika Saveza imenuje Upravni odbor.

Kriteriji za dodjelu priznanja Saveza utvrđuju se „Pravilnikom o priznanjima i odlikovanjima za rad na unapređenju lovstva“ koji donosi Upravni odbor Saveza.

#### **Član 74.**

Skupština Saveza na prijedlog Upravnog odbora može imenovati Počasnog Predsjednika Saveza koji savjetodavno može učestvovati u radu Upravnog odbora bez prava glasa. Počasni Predsjednik Saveza može biti lice koje je obnašalo funkciju Predsjednika Saveza.

### **URED I DRUGI ORGANIZACIONI OBLICI**

#### **Član 75.**

Radi realizacije programskih ciljeva i djelatnosti Saveza, izvan sjedišta Saveza mogu se formirati uredi i drugi organizacioni oblici na cijelom području Bosne i Hercegovine.

Odluku o otvaranju ureda i drugih organizacionih oblika donosi Upravni odbor Saveza, o čemu će izvijestiti Skupštinu Saveza.

Organizacioni oblici iz stava 1. ovog člana nemaju svojstvo pravnog lica.

**Član 76.**

Autentično tumačenje ovog Statuta vrši Skupština i Upravni odbor Saveza.

**Član 77.**

Stupanjem na snagu ovoga Statuta, stavlja se van snage Statut Saveza lovačkih organizacija u Bosni i Hercegovini, koji je usvojen na Skupštini Saveza dana 21.04.2018. godine pod brojem 01-038/18.

**Član 78.**

Ovaj Statut stupa na snagu danom donošenja i primjenjuje se od dana upisa u registar udruženja kod Ministarstva pravde Bosne i Hercegovine.

Broj: 01-019-3/24  
Sarajevo, 27.04.2024. godine



Predsjednik Skupštine Saveza  
Senad Kljajić

**OVJERAVA**

**Ministarstvo pravde Bosne i Hercegovine  
Sarajevo**

Broj: UP09-07-1-1559/24  
Sarajevo, 16.12.2024. godine

**PO OVLAŠTENJU MINISTRA**

*Dijana Beribaka*  
**Dijana Beribaka**

